



Hadisi ya Ujanja wa Sungula



Língua: Kimwani



Suku moja kalawa Sungula koka mmuto. Nakufika nanyenje ya muto, kammona Namondo.

Sungula akindairi Namondo:

- Epa uwe nomi arimba pakulu nani?

Namondo kajibu kaamba:

- Nirimba ndumi, uwe kunishinda omi?


Akilawa Sungula kaamba:

- Omi samini kamba uwe ndi urimba pakulu. Epa tuke tiyerere titende nsambo mmoja. Wakutemana, tivutane timmone ari na nguvu. Omi nukufunga nzizi, upande mwengine wa nzizi nisukula.

Nikwenenda kitambo, nikuka kurifunga omi. Nikisa kurifunga, nikwanza kuvuta. Ukifahamu kuvutiwa, nowe wanze kuvuta, uwe mmaji, omi kungulu.

Namondo ketikiza kaamba:

- Aye.




Fala Sungula akijiwa kuwa aana nguvu za kumpunda Namondo. Akilawa akituwa mpaka ka Nembo.

Nakufika, akindairi:

- Uwe Nembo, nomi ari na nguvu pakulu za kumpunda mwenziwe nani?

Nembo kannang'aniza Sungula kantikinyira kiswa, kaamba:

- Uwe Sungula ntoto javi-we, udaniza kwanazo nguvu za kunipunda omi?




Sungula kaamba:

- Omi samini kamba uwe ndi urimba kunipunda omi. Kamba kweli-kwelini urimba kunipunda omi, basi tuke titende nsambo mmoja. Nija nawo nzizi-wu nukufunge. Ikisa nikuka kitambo aba nikwanza kuvuta. Uwe ukifahamu kuvutiwa, nowe wanze kuvuta, tivutane, timmone ari na nguvu.


Kweli Sungula akiwafunga Namondo na Nembo.





Sungula akilawa, akitowa mpaka kati-kati akikala pafukutu. Akikola nzizi ure kuno na kuno, akivuta pakulu, ng'we. Ware Namondo na Nembo wakanza kuvutana sawejiwana.

Sungula akirinyamaza, akiwawona kuno akiwaseka. Namondo na Nembo wavutana fala aalawirire wakunshinda mwenziwe.



Mwinsho Nembo kaamba:

- Nifulata nzizi-wu nikimmone Sungula.

Nembo akifulata, akifulata nzizi, kufika nanyenje ya muto, kansingana Namondo.

Nembo akamba:


- Epa nduwe rafikiyangu!

Namondo akitikiza:

- Emm.

Wakikola kuseka:

- Haa! Haa! Haa!



Sungula akamba:

- Mwaja sukutubiseni?

Sungula akituwa.

Ntamana eyi hadisi-yi itifunda javi. Kuwa njanja sikuwa nkulu na kulongopa, akuna nkulu wala ntoto.



Ficha Técnica

Título: Hadisi ya Ujanja wa Sungula
(O Coelho, Hippopotamo e Elefante)
(The Rabbit, the Hippo and the Elephant)

Língua: Kimwani

Ilustrações: The Art of Reading 2.0

Primeira edição electrónica, 2010

Produzido por: SIL Moçambique
lidemo.net@gmail.com
C.P. 652
Nampula, Nampula
Moçambique

O utilizador pode copiar e distribuir a obra.

